

no. 12


LE
PROTECTEUR

DES PRINCES

DEDIE

A LA ROYNE.

M. DC. XV.



LE PROTECTEUR DES Princes,

A LA REINE.

IL faut que comme bon François i'ayme les bons François, & que comme seruiteur des vrays seruiteurs de mon Roy, i'espouse leur cause, & qu'avec eux ie face party avec le bien public, & grandeur de mon Roy: l'honneur trop le zele de nos Princes, de ces braues Princes, que mon cœur touché d'amour, & mon ame d'admiration adore en les voyant, & ne pense les voir assez pour les adorer, pour luy desnier vn effort de ma plume. Et bien que le courage des braues n'ayt besoing de ces honneurs, qui se tirent sur le papier, & que par l'advis des Assyriens on ne doibue dresser d'idoles au Soleil, parce qu'il se monstre mieux de luy-mesme, que la main du maistre ne le scauroit tirer: toutesfois comme c'est le propre de l'air, embausmé de quelque bonne odeur, de flairer souëuement, il faut aussi qu'un cœur fleurdelisé, & battu sur le coing de la fidelité Françoisie porte au besoing l'attestation de son affection, ou sur le trenchant de son espée, ou sur la poincte de sa plume, pour l'exposer aux yeux de tout le monde. Ainsi il faut que ma plume seconde mon cœur, & que comme du cœur i'honore & embrasse la grandeur de mon Roy, que ma plume en mon zele face voir l'affection de mon cœur, & l'amour

de ma patrie en la franchise de mes discours. Et que puis que ie reuere le courage & l'affection de nos bons Princes au bien de la patrie, que mon Anchre à la ruine de l'Anchre de Florence serue de tesmoignage au public des iustes intentions que ces braues ont vouié au bien de ceste Monarchie.

Et d'autant, Madame, que nos bons Bazanez crient que ces Princes, ces zelez protecteurs de cest Estat sont des boutefeux de nostre repos : & que vous, Madame, vous estes comportée en leur endroict en bonne mere : ie veux faire voir au public par vn veritable recit de leurs actions qu'ils se sont tous comportez en vostre endroit en bons enfans, & vous au contraire en Iunon, en marastre ; & que leur saint zele ayant esté reconnu, & puis favorisé de tous bons François, & Balanciers de la Iustice, que vous vous estes esleuée & contre ces bons Princes, & contre ces bons François, & contre la Iustice, afin que le public iuge, si quand la raison est mesprisée, la force n'est pas necessaire : Et si quand on se iouë d'une Monarchie, & qu'on la veut plustost par passion que par raison, ceux qui ont part à l'Estat ne doiuent pas s'efforcer de conseruer par amour ou par force la grandeur del'Estat.

Ainsi, Madame, pour commencer par les louables & zelées actions de nostre braue Prince, de nostre premier Prince du sang : & par les traictemens qu'il a receu de vostre Majesté : Ie diray, Mauame, que ce grand Prince ennemy du desordre & de la confusion s'est tousiours mon-

stré aux François en bon Genie, comme Lampridius Probus aux Romains, & tout en feu d'amour, comme Pallas paroissoit en feu à Diomede, pour le preseruer des dangers de la mort, a respiré tousiours la gloire de son ieune Roy, & fait voir à tous, que son interest particulier n'a peu aller si auant, que le zele qu'il a iuré au bien public, & à la fermeté du repos, de la grandeur & autorité publique.

Nous sçauons, Madame, & vous mieux que nous, que ce bon Prince, depuis le premier iour qu'il a eu l'honneur de vous toucher d'alliance & de proximité, a vescu en vostre endroict en fils, mais en bon fils. Et qui ne sçait, comme à la mort de nostre Grand Henry, de nostre bon pere, il prit le noir sur les iours noirs de France, reuint de son exil, non à main armée, comme vn autre eust peu faire: mais la larme à l'œil, les sanglots à la bouche, & la douleur au cœur, recongneut nostre Daulphin pour son Oingt, pour son Roy, fit party avec l'interest de son bien, de sa gloire, & de sa grandeur. Et en vostre endroit que fist-il pas? & que n'a-il pas fait pour vous obliger à luy vouloir du bien?

Il a, ouy, ce braue Prince pour vous autoriser en la regence de ce puissant Royaume offensé sa qualité, & trahy son merite, a esté tousiours sur le zele, sur l'honneur, sur le respect, & sur l'affection: & vous tout au contraire auez payé ses bonnes volontez de haine & de mespris: l'auiez déplacé & priué de la cognoissance des affaires

d'Estat, pour plaire à l'humeur des personnes artificieuses, & ennemies de la gloire de ce bon Prince, pour en laisser le manient à des morfondus, à des ethiques, & à des facquins, qui affriandez de ceste douce viande pour se perpetuer en l'excez de ce pouuoir ont vendu le Roy, l'Estat & la patrie, en sorte que l'ennemy de nostre repos, de nostre gloire, & de nostre grâdeur, est à la veille de moissonner le fruct de ses ambitions, si nos bons Princes, & si les vrayz François, par la valeur de leur espée, ne recueillent & accueillent la violence de cest ennemy, qui sous vn sacré pretexte d'alliance accourt au trot, & au galop aux ruines de cest Estat: & si par leur sage & genereuse conduite, ils ne mettent cest Empire, ce florissant Empire à couuert de ceste oppression, & ne le releuent par l'effort d'vn masse & genereux courage de ceste prochaine ruine. Helas! qui ne le voit? qui n'en crie, & qui n'en pleure.

Mais encore, Madame, vous scauez quel cœur ils ont ces meschans demons contre ce Prince, quels, & combien funestes leurs artifices, vous auez veu, comme ces pernicleux à ceste leuée d'armes, que la pitié & compassion des ruines de cest Estat auoit fait prendre à ce Prince, effrayez de la crainte du supplice que meritoient leurs crimes, & voyants qu'il estoit trop fort pour l'emporter de haulte lute, firent les cameleons, vous persuaderent de le gagner par des belles paroles, de l'endormir aux appas de l'esperance d'vn bon amendement de nos mœurs,

comme la lune ne pouuant iouyr d'Endimion,
l'endormit pour plusieurs mois, comme Iunon
pour traualier l'Hercule des Poëtes, faisoit ma-
licieusement endormir Iupiter, & auez si bien
fauorisé leurs pernicious desseins, que ce bon
Prince, qui porte escrit sur le front ce qui est
dans son cœur, qui d'ambition que du bien &
grandeur de l'Estat, comme d'un patrimoine,
auquel il a notable part, & qui a tousiours post-
posé l'interest de ses iustes plaintes au repos de
subjects de son Roy, croyant que vostre ame, &
celle de nos bons Agans, fussent de bonne mise
comme la sienne, que les effects seconderoient
vos paroles, comme ses parolles n'ont iamais
démenty l'effect de ses promesses, posa les ar-
mes, ferma les armes à la rebellion, au desordre,
au sang, & au carnage, & nous ramena du triste
lict de nos apprehensions à nostre premiere santé

Mais, Madame, comme vostre cœur estoit é-
loigné de la verité de ces belles parolles, il a eu
ce bon Prince vostre langue, mais nō pas vostre
cœur. Ha! Madame, il faut porter sur le front ce
qui est en l'esprit, comme dit Plotin. Et comme
le visage n'est qu'une ame racourcie, & comme
son escusson a plusieurs quartiers, aussi il ne
doibt trahir, ny falsifier la bonté de nature, qui
de son vray coing a imprimé nos naturels sur
nos fronts mesmes. Et puis que nostre intelli-
gence se conduit par la seule voye de la parole,
ne peut-on pas dire que celuy qui la faulse trahit
la société publique. Si c'est le seul outil, par le
moyen duquel nos volontez se communiquent

& nos pensées, & le truchement de nostre ame, n'est il pas vray que quand il nous trompe, nous ne nous tenons plus ? & quand il nous deçoit, il deçoit tout nostre commerce, & dissout toutes les liaisons de nostre police ?

Voulez-vous que ie le face voir, Madame, comme la parole a trompé, & nous, & ce grand Prince ? voulez-vous que ie le montre comme nostre Arresté de paix de Sainte. Manehou n'estoit composé de vostre costé que de pieces faulses, malicieuses, & artificieuses ? Et pour commēcer par le plus signalé monopole, qu'on a tramé pour alterer la gloire du desseing de ce Prince, n'est-il pas vray que le voyant chery & aimé de tous les bons François, pour le rendre odieux, & ruiner d'amitié, de credit, & d'autorité, on luy dressa calomnieusement ceste partie de Poictiers ? on cria l'alarme, qu'il vouloit ce bon Prince paruer cet Estat, ou plustost iouer au boute-hors avec son ieune Roy : que chan-toit autre chose ceste levée de boucliers, & ce voyage que le Roy fit à Poictiers ? Poictiers, peuple mutin, peuple seditieux, tu le sçais, vous le sçavez, venerable Prelat, qui avez esté le funeste fuzil de ce brasier : mais plus à plein vous le sçavez, prudent Philippeau, qui avez donné les memoires de ceste batterie, & encore pour authoriser ceste funeste tragedie, & attirer l'indignasiō des autres villes du Royaume, on a chassé, banny, exilé, & priué de leurs charges tant de gens de bien, tant zelez & fideles Officiers, comme factieux & traistres au Roy & à l'Estat.

Mais

Mais encôre de quel front a-on peu si calomnieusement mettre en auant ce malicieux desseing? n'est-elle pas belle l'apparence? que ce Prince luy quinziesme apres auoir posé les armes, ait voulu prendre vne ville riche en hommes, & des plus fortes du Royaume? Helas! que la posterité rira, quand elle lira ce subtile artifice, ceste belle menée, ceste leuée d'armes que l'on fit pour aller attaquer ce Prince desarmé, & en estat de suppliant: mais qu'elle fut belle la Iustice qu'on luy rendit de ceste offense: Adieu honneur, adieu respect, adieu seureté de nos Princes, puis que les affronts qu'on leur fait ont de l'honneur, de la gloire, & des bonnes pensions.

Mais encore quel malicieux artifice fut celuy duquel on se seruit à Bordeaux, ville capitale du gouuernement de ce Prince, pour le rendre odieux par toutes les villes de la Guienne? On fit accroire au peuple que ce Prince estoit arriué de nuict en leur ville, qu'il estoit caché en quelque maison, & que c'estoit pour monopoler eontre leur liberté, & que par ainsi il falloit apporter promptemēt le remede à ce mal. Et tout aussy tost quelles recherches exactes ne fit-on pas dans les maisons de ceux qui ont l'honneur d'estre seruiteurs de ce Prince, & quels vacarmes ne fit-on au Parlement, les Chambres assemblées? Et en fin apres ces recherches ne l'ayant peu trouuer, pour en estre esloigné de cēt lieux ou plus, le Parlement desirant signaler sa prudence, ou plustost sa folie, prononça vn arrest

memorable, à ſçauoir que où ce Prince ſe preſenteroit pour entrer dans la ville, que les portes luy ſeroient refusées. N'eſt-ce pas vne belle ſuitte de l'action de Poictiers? Et ce beau Parlement ne tient il pas de la maladie de ſon ſage Prelat, comme le peuple de Poictiers de celle del'Eueſque? Ha! qu'elle a eſté puiffante ceſte année paſſée, la conſtellation de nos bons Prelats, de nos bons Pasteurs, puis que tant & tant de teſtes ont marché à la démarche & cadence de leur folie? Ha! Bordeaux, ha! peuple ingrat, eſt-ce ainſi que tu recongnois l'honneur que tu dois à ton Gouverneur, à ton Prince? Eſt-ce ainſi que tu veux fuir l'aſpect de ce grand Soleil, pour eſtre priué de l'honneur & de la gloire que tu reçois de ſa preſence, comme la Lune perd la lumiere qu'elle auoit du Soleil, lors que elle fuit ſon aſpect, & ſe iette dans les tenebres. Eſt-ce ainſi que tu deſchires l'honneur de ce grand Prince, apres en auoir receu tant de bien-faits, comme les Lybiens bruſlent la tige & le branchage du Ladanon, apres auoir cueilly la gomme aromatique? Et vous grand Parlement, qu'avez-vous fait? quel ſiniſtre iugement avez-vous donné ſans charge contre l'innocence des actiōs de ce Prince, qui vous careſſoit, qui vous honoroit, & vous cheriſſoit avec tāt d'affectiō? Deſbauchez, ouy vous l'eſtiez par trop del'eſprit; i'en rougis, i'en ay honte, qu'une ſi grande cōpagnie ait fait vn ſi grand pas de clerc? Voyez maintenant ſi les intentions de ce Prince ſont zelées, puis que ce grand Senat & grand Parle-

ment de Paris espouse son party.

Et bien que ce bon Prince eut subiet de tirer raison de toutes ces offenses, toutesfois de tirer de nous relancer en l'horreur de nos diuisions, aima mieux s'offenser soy-mesme, que d'alterer le calme qu'il nous auoit donné, & gaigné par ceste charitable consideration, ne voulut autres armes que l'oubly, ny d'ambition, que de se rendre pres de son Roy.

Mais comme ces meschans Agans ne se peuant acerediter qu'en son absence, aussi s'opposèrent-ils long temps à son retour, & pour tesmoignage de ce déplaisir, vous fistes, Madame, à leur persuation defense à la Noblesse d'aller au deuant, & de luy rendre l'honneur que sa qualité & ses bons seruices meritoient & demandoient du deuoir d'un chacun.

Mais arriué que ce Prince fut, quels tesmoignages de bonne volonté n'avez-vous receu de son obeissance? qu'avez-vous désiré qu'il n'ayt voulu? & qu'avez-vous voulu qu'il n'ait executé? Vous avez désiré contre le traicté de Sainte-Menehould la tenuë des Estats en la ville de Paris, & luy aussi. Mais perfidie par trop grande, c'estoit vn artifice pour tirer avec aisance, party des passions ruineuses des ennemis de nostre repos: vous voulustes qu'il ne parlast à l'ouuerture des Estats, comme il vouloit faire, pour faire voir le zelé motif de ses iustes intentions. Mais parce que le iugemēt de son zele seruoit de condamnation, de honte & de confusion à nos Bazanez, ce bon Prince qui mendie d'ailleurs que

de foy-mefme des tefmoignages ny d'applaudiffemens de fes actions, que de la complaifance & fatisfaction de fa propre conſcience, n'eult de l'ague que pour ſe taire. Et encores vous fiſtes deſenſes aux Deputez, que ſi ce Prince ſe preſentoit aux Eſtats pour parler de rompre l'aſſemblée, de peur que les Deputez ne recognuſſent l'ulcère de l'Eſtat, ainſi Minerue fauoriſant le party des Grecs, pour leur donner l'aduantage tetira Mars du combat qui fauoriſoit les Troyens : Ainſi les loups, dit Eſope, demandèrent les chiens pour plus facilement deuorer les agneaux. Ha! pauvres Deputez, où eſt le courage, où l'honneur, où la liberté François, qu'oy craignez-vous la langue de ce Prince? Ses diſcours, il eſt vray, ſont animez d'une force guerriere, mais plus guerriere que n'eſtoient iadis les harangues de Demosthene, qu'il appelloit ſoldats, d'un feu plus diuin que celui qui ſortoit de la bouche de Cacus ou de Sapho, d'une roideur, mais toute autre que n'auoient les diſcours de Pericles qu'on appelloit des foudres. Ils eſtoiēt, il eſt vray, à craindre, ces eloquens diſcours, & ces paroles maſles; ouy, ils euſſent rompu la trame des malheureux proieſts de l'ennemy de cet Eſtat, & vous vous en fuſſiez retournez au lieu de la haine & indignation, que vous auez encouru du peuple, chargez d'amour, d'honneur & de gloire.

Mais encore, Madame, que diray-ie, mais que ne dit tout le mōde de la paſſion que vous euſtes pour les baſtonnades que ce Prince fit donner

pour chastiment d'une trahison domestique ?
 n'auons-nous pas veu l'émotion qu'on a voulu
 faire ? n'auons-nous pas sceu comme on a brigué
 la maison de ville, & le Parlement & les Estats,
 donné au Roy ce detestable aduis de se seruir de
 l'Eglise, de cousteau, & de la Iustice, tous les
 discours qui se sont tenus à la sourdine, & comme
 en attendant vn decret cōtre le sieur de Ro-
 chefort, on auoit resolu d'enuoyer deux com-
 pagnies du regiment des Gardes pour boucler
 son Hostel : resolution qui eust esté suiui de
 l'effect, si quelque bon Genie ne s'y fust opposé.
 Las ! helas, Dieux tutelaires de ces sacrez Ho-
 stels, où est vostre respect ? Ha ! Madame, où se-
 ra la seureté, si elle n'est avec nos domestiques ?
 Les Prestres des Dieux, disoit vn certain, sont
 les plus seures gardes de leurs temples saints &
 sacrez, & les seruiteurs les plus fideles gardiens
 des secrets & de la vie de leurs Maistres. Zopy-
 ren'aimoit rien tant que son Xerxes, Ephistion
 que son Alexandre. Et tout au contraire, ce ser-
 uiteur, perfide & desloyal, oubliant son deuoir
 & les bien-faits de son maistre, l'a vendu, l'a tra-
 hy, & pour vn leger chastiment qu'on a voulu
 prendre de ceste perfidie, vous auez donné l'es-
 for à vostre passion, auez receu ce desloyal en la
 protection du Roy, & auez poursuiuy le maistre
 comme criminel de leze Majesté. Ha ! Madame,
 cet effort qui fait à main armée par vn cadet de
 Gascongne à l'autorité de ce grād Parlement,
 & au mespris de l'obeissance de nostre ieune
 Roy ne fut pas si criminellement puny, la con-

fideration de la caballe fut plus forte que l'intérest de l'autorité du Roy, & seureté de l'Estat. Les assassins encore projettez, resolus, & executez par vn coyon, & par vn estrangier contre des Seigneurs signalez ont trouué leur couuert & leur impunité, & de bastonnades ont eu besoyn d'ambition.

Et d'ailleurs n'auons-nous pas veu comme ces lasches intendans, ialoux du bon accueil que ce grand Parlement fait à ce Prince, & du zele qu'il a voié au bien de la Iustice, ont crié l'alarme, vous ont volontairement fait accroire que vous estiez à la veille d'estre depossédée, & par ainsi qu'il falloit defendre à la premiere occasion, l'entrée au Parlement. Et ioignant les effects à ce mauuais dessein, sur l'advis qu'ils eurent que les Chambres se deuoient assembler, vous en sçauiez, Madame, mieux que moy le subject, vous enuoyastes sous le nom du Roy luy faire deffenses d'aller au Parlement : & encore pour adiouster à ceste offense vn si signalé affront, vous fistes boucler son Hostel de gens d'armes. Ha ! ie vois bien, ces meschans ne veulent pas de surueillā, on craignoit que ce Prince ne vist les registres du Parlement, qu'il n'y leust l'accusation de la femme qu'on sçait bien, & celle de Rauillac : & en fin qu'il ne fist reconnoistre à ce grand Parlement, comme il a fait la verité du zele qu'il a voié au biē de cest Estat.

Mais encore, quel vacarme n'a-on fait ? quel ruineux conseil n'a-on tenu ? & quels monopoles n'a-on tramé contre ce Prince sur l'opinion

que vous auez eue qu'il auoit meu ce grand Senat, ce venerable Parlement de représenter au Roy les abus de l'Estat, & les ruineux desseings quel'on dresse à la grâdeur de ceste Monarchie? Et qui ne sçait que si vostre vouloir eust secondé vostre pouuoir, & celuy de nos bazanez, que ce bon Prince seroit desia dans la Bastille. Vous y auez opiné tout hault, braue Dolé: Mais sçachez trestous que la capture de si grand Prince, mesmement en vne si grande innocence de ses actions ne passe pas aisément, ny sans solemnelle consultation du ciel, que sa vie qui en couure tant d'autres, de qui tant d'autres vies dépendēt, & qui remplit tant de place, ne se déplace pas, comme celle qui tient à vn simple nœud, & que ces ames si rares & exemplaires coustent plus à faire mourir, qu'une ame populaire & inutile, & qu'il est ce bon Prince, si attaché à l'Estat, qu'il n'en peut sortir que tout ne se mette en pieces, non plus qu'en ce bouclier admirable de Minerve, l'image de l'ouurier ne s'en pouuoit tirer qu'en pieces.

Et tous ces autres Princes, & tous ces bons François, qui avec ce grand Prince ont fait party avec la grandeur de leur Roy, que vous ont-ils fait, Madame? & en quoy ont-ils desseruy le Roy, ou le public? dites-nous en la cause, comme vous nous faites voir les effects de vostre indignation. Ha! Madame, c'est trop presser & opprimer ces glorieux Athlettes de nostre gloire: c'est par trop authoriser l'insolence indiscrete de ces pigmées, de ces auortons de fortune,

qui crouassent en corbeaux affamez, & abayent en chiens enragez contre l'honneur de ces Braves, ne pouuans comme aiglons bastards supporter les rayons d'un si beau Soleil. Ha ! qu'il fait beau voir qu'un Faquin paré des plumes estrangeres, qu'un lasche, qu'un Pisandre, vueille tenir le haut sur un Longueuille, la gentillesse, la courtoisie, les delices de cest Estat, & si courageux, qu'il sera couronné comme iadis le ieune Diomedé d'autant de Lauriers qu'il rendra de combats. Qu'avez vous resolu, Madame, de faire de ce beau mignon ? N'est-ce point d'en faire un vice-Roy ? ie le croy : car vaque un office en la Iustice, un benefice en l'Eglise, une place en nos forteresses, à l'Anchre, à l'Anchre. Et mesmes depuis peu n'avez vous pas osté Amboise à ce grand Prince auant la closture des Estats malicieusement, pour le donner à ce grand Marechal ? Et puis, Madame, ne luy avez vous pas destiné pour gendre un Prince, un fils de nostre grand Henry, de vostre bon mary ? n'a-il pas luy seul plus de finances que tous les Seigneurs & Princes du Royaume ? & qui a tant de millions que nostre grand Henry nous auoir laissez ? Qui ? Tous ces deniers qui se sont leuez, & qui se leuent sur la sueur & sur le sang du pauvre peuple que ce beau mignon : mais encore n'est-ce pas le traicter en Roy, que de vouloir faire declarer ses ennemis criminels de leze Majesté, & les enuoyer à la Bastille, vous le sçavez, braue Longueuille, comme on vous a mis sur le tapis, vous le sçavez aussi braue Nestor, Genereux Turen-

ne, tout blanchy sous les signalez services que vostre zele a rendu au bien de cest Estat.

Et encore, Madame, que vous a fait ce grand Parlement pour l'auoir traicté avec tant de rigueur? Que dites vous Dolé? que dites vous Bul lion? qu'il faut enuoyer vos bons Seigneurs les vns en Greve, & les autres à la Bastille, vous osez vous si insollement esleuer contre ceux qui ont donné le poux & le mouuement à vostre fortune. Hé! Madame, permettez-vous qu'on diffame des personnes si sacrésainctes, & des Génies, & Dieux tutelaires de vostre autorité, & de vostre grandeur? Il y a, vous dit ce grand Senat, des abus en l'Estat, des volleries aux finances du Roy, & de l'eez aux subsides du peuple: est-ce vn crime, Madame, de dire le vray? Si le peuple crie, & si tout crie, ne sera-il pas permis à la Iustice de recueillir les larmes des subiects, & les presenter à son Roy pour faire repleuoir ces cris, & ces larmes en graces, & benedictions, comme le Soleil rend à la terre en pluye pour l'enrichir des fruiets, les vapeurs qu'il a tiré de la terre. Le temps, dites-uons, n'est pas propre pour corriger nos mœurs, & nos abus; Mais, Madame, ne donnez pas au siecle nostre deprauation, mais aux hommes de nostre siecle, ne nous en deschargeōs point sur le tēps, car ils sont en nous, & nō en nos ans: Ne disons point que c'est chose par trop difficile: ce n'est pas parce que cela est difficile, que nous n'osons pas l'entreprendre, cela est difficile. Mais combien ay-ie meilleure opinion de vous, que vous

mesmes? Car ie dis que vous pouuez accomplir tout cela avec vne grande gloire, mais que vous ne le voulez pas : & que si vous en vouliez faire l'essay, que vous le trouueriez en l'action mesme plus facile que vous ne l'avez conceu : mais voulez-vous que ie die le vray : Nous auons hôte d'apprendre à estre gens de bien Et parce que ces bons Princes, & ce grand Parlement recognoissent les monopoles qu'on trame en faueur de nostre Bazané, contre la grandeur de ceste Monarchie : on voudroit bien loger nos Princes à la Bastille, pour pouuoir avec aisance authoriser ce funeste dessein.

Ha! Madāme, ce siecle n'est pas vn siecle d'or, mais vn siecle de fer. Car au siecle d'or de nos anciens, le plus puissant vsoit avec moderation de son authorité, n'auoit iamais volōté d'essayer combien il estoit puissant à l'encontre de ceux qui releuoient de sa puissance, ne cōspiroit contre la vie de son moindre : Aucun sujet aussi ne s'esleuoit contre son superieur, d'autant qu'on faisoit gloire d'obeir à celuy qui commandoit bien : & puis aucun ne pouuoit estre plus puissant, qui ne fust le meilleur. Au contraire, Madame, en ce siecle ce n'est que passion, que déreglement, que desbauche d'esprit, que desordre, que cōfusion, qu'opiniaistreté à mal faire, nous sommes plustost rompus que redressez : nous aimōs mieux mourir avec nos vices, que les vices en nous. Nos testes, ie parle de nous autres qui manions l'estat, sont blanches au dehors, mais noires au dedans, la plus-part de nous auons le poil

& l'autorité des vieillards, mais les vices des enfans: & ne sommes innocens que par ignorance. En ce premier siecle encore, le seruiteur ne se pouuoit esleuer contre l'enfant de la maison sans estre criminel, ny luy refuser l'honneur & le respect, sans estre seuerement puny, parce que ce mespris reiaillissoit à l'interest du pere: Et aujourd'huy en vn grand Estat, en vn puissant Royaume où les Roys & les Princes sont donnez de Dieu, de petits coquineaux & des larrons pour se voir veillez par vn grand Prince, qui pour estre de la maison à part au ressentiment de ces ruines s'esleuēt contre luy: & comme ces Geans bouffis d'orgueil & de presumption conspirent contre luy: & non seulement contre luy, mais contre tous les bons & fideles François. Helas' Madame, quel assassinat entrepris sur la personne de ce grand Marechal de Bouillon, de ce bon François, de ce fidele, & zélé seruiteur, crie. Et quoy? se peut-il faire qu'en France, qu'en vn si grand Royaume les Roys & les bons François ne pouuàs mourir d'une belle main, ny d'une belle espée, soiēt tuez d'un coup de cousteau? Je ne m'en estonne pas, Madame, car vne iniure impunément receuë en appelle vne seconde, & la seconde vne troisieme, & ainsi de degré en degré iusques à l'infiny. L'impunité de la mort de ce Grand Henry, de ce bon Prince autorise tous ces assassinats qu'on projette: & si on a entrepris sur le pere, si on conspire contre les Princes, croyez qu'on conspirera bien encore contre nostre ieune Roy. Je pleure,

Madame, quand ie me presente, comme vous fistes rayer des cayers l'article qui portoit la recherche des auteurs du parricide de nostre Grand Henry.

Le temps ne permet pas, dites-vous, de toucher ceste corde. La femme qui est entre deux murailles vit encore, il y auroit du danger d'esbranler tout l'Estat. Helas ! il faut bien croire donc que vous sçavez que l'auteur est bien puissant. Mais si puissant qu'il soit, que craignez vous ? Doutez-vous, que comme tous les bons François ont partagé aux travaux, & à la gloire des triomphes de ce grand Roy, qu'ils n'ayent aussi tous part au ressentiment de l'assassinat commis en sa personne. Nous eussions, cbmme nous ferons encore, ioint en nos armes à celles que la douleur, & les iustes regrets vous deuoient faire prendre, nous eussions secouru vostre dueil de nos forces, & tiré une pie vengeance de ceste cruauté. Ce grand Prince, Madame, vous le sçavez, s'est offert, comme interessé en cest assassinat, d'entreprendre ceste grande poursuite, & en eust tiré party, si vostre ressentiment eust favorisé son zele. Vous y avez résisté, parce que, peut estre, ce coup eust rompu le dessein qu'on a dressé aux ruines de ceste Monarchie. Plustost mourir, vous le deuiez, Madame, que desnier à l'amour que ce bon mary vous portoit, la vengeance de ceste perfidie: au moins il falloit faire puis qu'en cès si signalées occasions ses efforts iustes sont nécessaires; les nécessaires, honnestes; & les honnestes des descharges de nostre de-

uoir.

Que si les Princes crient, si les bons François, si la iustice, Ha! Madame, que le peuple crie bien plus encore: De l'issuë de nos beaux Estats, tout y a esté, vous le sçavez, Madame, brigué, gagné, corrompu. Les Deputez auoient tous les matins leur leçon par escrit: l'issuë aussi nous a fait voir que le remede est pire que le mal: Car qu'a-on arresté, ny conclu, qu'une alliance d'Espagne, qu'une funeste ruine de la gloire de ceste Monarchie? Et encore on ne tient pas au peuple ce qu'on luy a promis: Car vous auiez promis aux Deputez d'abolir le droict annuel: vous l'auiez fait à la verité, mais dix iours après vous l'auiez remis. Ha! qu'elle est bien gardée la foy publique. Vous auiez aussi promis la reuocation de tant de pensions inutiles, mais nous les augmentons tous les iours, & surchargeons de plus en plus le peuple.

Et parce que nos bons Princes, ce bon Senat, & tous les bons François recognoissent où vôt ces pernicieux desseins; ils aiment mieux mourir, Madame, avec de l'honneur, que de suruiure par leur lascheté aux ruines de ceste Monarchie; comme ce bon citoyen Præneste, qui pouuant viure en la mort des Lybiens, aimoit mieux mourir avec eux. Cela est trop visible; que c'est à ce coup qu'on veut fleurdeliser nostre bon Bazané, nous le sçauons, comme le Chancelier a refusé le sequestre du Marquisat de Saluce, pour le faire donner à l'Espagnol: Nous sçauons qu'il fauorise le desseing, que ce mesme ennemy a

sur Cleues, & sur le Piedmont, l'un pour nous mettre vne barriere entre les Holandois & les Allemans : & l'autre pour le faire Roy des Romains. Nous sçauõs pourquoy on vouloit à ces Estats faire ordonner pour loy fondamentale, que nostre Roy releueroit du temporel de l'autorité de l'Eglise : nous voyõs encore par trop à quoy aboutit le dessein de ceste belle alliance : c'est, Madame, pour donner moyen à cest ennemy de triõpher de nos ruines : car par ce moyen tous nos alliez se départent de nos alliances. Et encor par malheur, afin qu'il se preuille de nostre desunion, on vous veut par le mescontentement du peuple, de la Iustice, & de nos Princes legitimes, engager en des guerres ciuilles. Ha ! Madame, il faut costoyer ce rocher, plus nous le recognoistrõs espouuantable, mieux nostre apprehension apprendra d'en fuyr le peril. Iason apres auoir les dents du Serpent, desquelles nasquirent des gens d'armes, ietta vne pierre au milieu d'eux, les fist esleuer les vns contre les autres, & à la fin entretuer, afin de rapporter paisiblement la toison d'or. Estouffons, ie vous prie, ce Serpent au berceau, n'attirons pas sur nous la malediction du peuple, & par apres l'indignation du Ciel.

Ie crains, Madame, ie crains que si vous faites par opiniastrété ce que vous ne deuez par raisõ, & par passion ce que vous ne deuez entreprendre que par amour, que ces bons Princes forcez de la puissance d'un charitable zele, la larme à l'œil, & mille & mille sortes d'execrations con-

tre les auteurs de ceste confusion, tafcheront de repouffer par la valeur de leur espée la violence de ceste passion. Ils retiennēt, tant qu'ils peuvent, l'effor de ce grand mouuement. Nous ſçauons leurs iuſtes intentions : & comme à ceste leuée d'armes que la meſme pitié leur auoit fait prendre, ſi toſt qu'ils recogneurēt que pluſieurs ſe vouloient mettre hors des gonds du deuoir, & cornoient la guerre, qu'auffi toſt ces Braues, de ces petits commencemens iugeans quelle ſeroit l'iffuē de ceste confusion, en pilotes genereux tournerent teſte vers la tempeſte, empêcherent ces faux accords, qui vouloient troubler l'harmonie de ceſt Eſtat, & ſouſtindrent par leur prudence le branſle de toute l'Europe.

Que ſi aujourd'huy, qu'à Dieu ne plaiſe, ils reprennent leurs glorieuſes briſées : c'eſt Madame, qu'au lieu d'un bon amendement tout a empiré, que les cris du peuple ont redoublé, & que les deſſeins de noſtre ennemy ſont ſur le poinct de ſ'eſclorre à la ruine de noſtre repos. Ainſi puis que tous les bons François iettent les yeux ſur eux, & l'eſperance de leur allegement ſur leur zele, & ſur leur courage, ils ne pourront, Madame, ces braues Princes, deſnier au public, & à leur ieune Roy, les effets de leur zele. Ouy braues Athlettes, ie croy que comme vous eſtes le rempart de la grandeur de voſtre ieune Roy, & la ſeule tour d'airain, qui n'a peu eſtre percée par la force de l'or de Caſtille, que vous ioin-drez auffi à la grandeur de voſtre zele le merite de voſtre valeur. Et ſi c'eſt un arreſt du deſtin

que la gloire de cest Estat ne doiue plus long
temps fleurir, vous aurez au-moins de l'hon-
neur, que le fer de l'ennemy en soit la ruine, plu-
stost que ses menées, & ses corruptions; & s'il
nous faut estre miserables, au-moins il n'y aura
point de crime de nostre part attaché à nostre
misere.

Vous pouuez, Madame, vous pouuez avec ai-
sance empescher ce desordre, & destourner l'o-
rage de la ruine de nostre repos. Car puis qu'on
vous chante si haut, que l'Estat est vendu, que ce
mariage est la planche sur laquelle de Madril on
veut venir à Paris pour déthroner nos bons
Bourbons, & que ce venerable Parlement sca-
uant aux remedes de ceste maladie a porté à vos
pieds l'antidot & le preseruatif de ce venin, ne
deuez-vous pas pour vn temps faire halte à ce
mariage: & cependant respondre aux cahiers
des Deputez, aux remonstrances du Parlement,
& au mescontentement du peuple afin que l'af-
fection qu'on recognoistra que vous portez au
bien de cest Estat, vous acquiere pour recōque-
rir à nostre ieune Roy, ce que cest ennemy, au-
quel vous le voulez allier luy détient, autant de
soldats & de Capitaines que vous en voulez
mettre sur pied pour nous perdre.

Croyez, Madame, que si vous mesprisez les
larmes du peuple, & la Iustice des hommes, que
vous-vous engagerez avec nous aux coups de la
Iustice du Ciel. Les prieres sont filles legitimes
de Iupiter, Elles ont cela de charitable, que
quand elles sont bien receuës de la personne à
la

la persōne à laquelle elles s'adressent, elles supplient Iupiter pour sa prosperité: au cōtraire celle de iuste, que si on ne les escoute ainsi qu'elles meritent, elles attirent l'ire de Iupiter, & le prouoquent à vne seuerē & violente vengeance.

Ceux qui ont le meſnage d'un grand Estat, en tous les grāds & signalez actes, ausquels le bien public sert de premiere cause, doiuent fermer leurs yeux à leurs passions particuliers. Ainsi Agamemnou voyant que le Dieu Apollon estoit irrité contre les Grecs, & enuoyé qu'il n'auoit voulu rendre la belle Criseis à son pere, après auoir fait rendre un long combat son amour, la rendit pour appaiser l'ire du Ciel: *Si le conseil, disoit ce sage, a trouué bon que Criseis soit rendue, ie n'y veux controuenir: car ie ne desire pas que mon plaisir particulier soit cause de la perte de tous ces Grecs: Vous deuiiez aussi, Madame, sur les plainctes & crieries qu'on fait, & sur les remonstrances de ce grand Parlement prendre ceste genereuse resolution, & dire tout haut. Puis que ce venerable Senat ne trouue à propos de preferer l'alliance de l'Espagnol aux alliances de tous les Princes de l'Europe, & que ie perdray les bons amis de cest Estat, pour donner le baiser d'amitié à celuy qui ne peut estre qu'ennemy de la France, ie les suivray ces sages testes, ces fermes colonnes de la grandeur de ceste Monarchie.*

Et puis, Madame, un grand courage ne s'allie iamais avec son ennemy. Ainsi Achille après l'offense qu'il eust receuë d'Agamemnon, pria de s'apaiser & d'accepter le mariage de l'une de ses

filles, le refusa aussi honorablement que genereusement. Le Grand Henry, ennemy immortel de cest ennemy, a eu aussi le courage si genereux, que de ne vouloir l'alliance de ce superbe. Et quoy ? n'heritons-nous pas de son ressentiment, aussi bien que de son courage. Sera-il dict que l'apprehension que nous auons de cet ennemy nous face rechercher son alliance, & qu'on donne à nostre lascheté le blasme d'auoir esté vaincus par nostre coyonnerie, ne le pouuans estre par le sort de nos ames. C'est bien raualler le merite du courage de ceste genereuse Noblesse Françoisse, Noblesse qui à la seule demarche a tousiours fait trembler ses ennemis, & n'est iamais venuë aux mains avec cest ennemy de nostre grandeur, qu'elle n'ait eu plus de peine à luy donner la vie qu'à le combattre.

Et encore, Madame, si ce grand Agamemnon, si ce bon Roy dōna pour victime à Diane courroucée sa fille, sa chere Iphigenie, pour rendre le vent fauorable à ses vaisseaux, & leuer les empeschemens qui les retenoit dans le port, & se chargeant seul du mal-heur tombé sur toute la Grece, aimamieux perdre sa propre fille. que de voir plus long temps ses subjects en peine. Si l'excez de l'amour qu'il portoit au public, luy fit commettre vne espece d'inhumanité contre soy-mesme. l'amour, Madame, que vous deuies au public, au Roy, & à l'Estat, deuroit contrepeser la passiō que vous auez pour ce beau Marquis. Ha! Madame, bien que Didon eust enseue-ly toutes ses amours dans le mesme tombeau

où elle enterra les cendres de son mary Sichée : toutesfois l'impudence Romaine n'eust point honte de le faire brusler, languir, & mourir pour Enée. Vous deuiez, bien que toute chaste, craindre ce mesme iugement : & pour oster tout subiect de soupçon, vous despouiller de ceste passion ruineuse, pour mettre à couuert vostre honneur d'un amour calomnieux, comme Vlysse se voyant sur le poinct de faire naufrage, despouilla ceste belle robe que Calypso luy auoit donnée. Croyez-moy, les Singes embrassent leurs petits pour les estouffer, & le lierre accolé la muraille pour l'enterrer. Vous deuriez encore, Madame, permettre la recherche des voleries des finances du Roy, des trahisons de l'Estat, & des conspirations qu'on fait contre nos Princes, afin que par vne pie vengeance, le ciel irrité contre nous, appaisast son ire & son indignation. Il n'y a, Madame, sacrifice plus agreable à Dieu que celui d'un crime bien égorgé.

Et parce que Dieu est irrité des crimes de ces particuliers, il faut que la France, ceste pauvre France en general, soit exposée au fer & au trenchant, au sang, & au carnage. Il me souuient, Madame, auoir leu dans Homere, ce grand homme d'Estat, que Vulcan auoit graué deux citez sur les armes d'Achille, & qu'en l'une il n'y auoit que nopces, que festins, & que deuant l'autre deux armées estoient campées, ayans deux differens desseings : car l'une vouloit tout mettre au sang & au carnage, & raser la ville à fleur de terre, & l'autre se contentoit de partager les biens

& rithesses de ceste ville : Nous voicy, Madame, nous voicy au mesme estat ; vous estes dans les nopces, dans les festins, tout retentit chez vous, de cris de ioye & d'allegresse. Mais tous les bons François sont dans les pleurs, dans les larmes & assiegez, si Dieu ne destourne l'orage, de deux armées de different dessein : car l'une a iuré la ruine de nostre repos, de nostre gloire, & de nostre grandeur, & l'autre poussée d'un charitable zele & d'un saint amour qu'elle porte à son Roy, à l'Estat, & à sa patrie, se veut presenter pour partager, non nos despouilles, mais nos malheurs, nos miseres & nos ruines. Et pour faire teste à l'orage qui nous menace, vous fauorisez la premiere, & nos bons Princes, comme des bons & fideles protecteurs de nostre bien & de nostre grandeur autoriseront la seconde. Vous scauez bien, Madame, comme ces bons Princes ne sont poussez à ceste genereuse actiō, pour vous obliger à donner à l'un de l'argent, à l'autre des charges, & à l'autre des fortereffes. Vous scauez, braue Villeroy, comme ce grand Prince à la conference que vous deuiez auoir avec luy à Creil, vous dit tout courroucé qu'il ne falloit pas mettre sur le tapis son interest particulier, mais celuy du public, qu'il falloit satisfaire aux remonstrances de ce grand Parlement, & pour l'affermissement de la gloire de ceste Monarchie confirmer les alliances des Princes estrangers.

Et qui sera donc, si on vient à la rigueur, le bon François, qui ne ioin dra son zele à la valeur

de ces bons Princes, qui ne se représentera avec eux au deuant des yeux la grandeur de nostre ieune Roy, & l'honneur de nostre patrie, qui ne s'armera de courage pour ne laisser perdre la gloire de ceste Monarchie. O François! ô bons François la valeur du genereux sang de ceux d'où vous avez tiré naissance, le courage dont ils ont terrassé tât de fois cet ennemy de nostre gloire, & le saint zele de nos Princes par vn gracieux appel, inuitēt vos courages à ce champ d'honneur: ioignez donc vostre ressentiment à celuy que la douleur des ruines de cet Estat leur fait auoir, secourez leur zele de vos forces, afin qu'avec vostre aide ces Braues releuent de ceste prochaine ruine la grandeur de vostre patrie: & la retirent de l'esclavage de l'Espagnol, de cest ennemy de nostre bien, de nostre gloire, & de nostre repos. Vous voila à la cadene, à l'esclavage, & au premier iour à l'inquisition: & qui pis est, vous verrez bien tost ce glorieux nom de François changé en Castiilan. Helae! ie pleure quand ie me represente que la passion de quatre ou cinq coquineaux, traistres à leur Roy, & deserteurs de leur patrie, soit sur le point de mettre ce grand Estat, ce florissant Empire en vne funeste cendrée. Et quoy? pour conseruer le general, & pour authoriser la grandeur de nostre ieune Roy, qui ne s'esleuera contre ces pensionnaires d'Espagne, & ne s'armera de pierres pour lapider ces vendeurs de nostre bien, & de nostre liberté. O François! ou vous n'estes plus François, ou vous ferez vostre party

avec les bons François. I'ay honte, ie rougis en mon ame de voir qu'on aye tant tardé à mettre la main à vne si glorieuse & genereuse executiō. Ce sont, direz-vous, Madame, les mesmes Officiers qui seruoient le feu Roy. Ha! Madame, iamaïs Conchine ne posseda du viuant du feu Roi tant de belles & fortes citadelles, iamaïs il ne fut ny Officier, ny Marquis, ny Marechal, c'estoit vn petit hibou, qui ne paroissoit quē la nuit: & aujourd'huy de la poussiere, le voila éleué au ciel, le voila le premier Comediē de ceste funeste tragedie qu'on iouē sur le theatre de ceste Monarchie: & vn Dollé, vn Bullion, & tant d'autres, qu'estoient-ils, Madame, du viuāt du feu Roy? Ha! i'ay honte de le dire, mais plus grand' honte de les voir mesnager si traîtreusement les deniers du Roy & du public. Et le Chancelier, Madame, n'estoit-il pas sur le point de receuoir vn bonnet rouge, si le feu Roy eust vescu encore quelques iours? Et ce Cadet de Gascongne, ce morfondu, qui n'a que des paroles de menaces: Et qui pour faire parler de luy veut faire vn coup de Gascon: Auoit-il le cœur ny l'oreille du Roy? & vsoit-il d'vn Empire absolu, comme il fait aujourd'huy? I'honore trop la memoire de ce grand Roy, pour croire que de son viuant vn Conchine, vn Dollé, vn buillon, & tant d'autres larronneaux, eussent eu voix en vn si grand Estat: Et qu'il ne reconnut, ce sage Roy, que ce Cadet couuoit en l'ame quelque funeste & mal-heureux desseing. Et par malheur, Madame, vous-vous seruez de ceux que le

feu Roy ne voyoit que d'un œil, & encore d'un œil d'indignation : Ce sont ceux qui gouvernēt l'Estat, partagent les finances, & se ioiēnt de l'autorité de nostre ieune Roy. Ainsy, Madame, ne dites pas que vous-vous seruez des mesmes Officiers que le feu Roy, mais des ennemis de l'Estat & de la patrie. Et encore, Madame, vous protegez l'impunité de leurs crimes : & ne voulez permettre que ce grand Parlement face recherche de leur vie. Et quoy ? si le Roy doit la Iustice au particulier, à plus forte raison au public : si un simple larrecin merite la mort, à plus forte raison vne vollerie des deniers du Roy & du public : si un simple homicide merite la chorde, à plus forte raison le cruel assassinat commis en la personne du plus grand Roy de l'Europe merite d'estre expié, non seulement par le sang, mais par le feu, & par les plus cruels tourmens, d'un Phalaris.

Et parce que ces bons Princes, les vrais enfans de la maison, voyoient si traistreusement par les despouilles de leur patrimoine, qu'ils en crient & en priué & en public, & qu'ils en demandent Iustice, vous-vous esleuez contre eux, les menacez d'une Bastille, & encore les voulez faire danser en un temps de deuil, & en un tēps auquel on a compris de nostre gloire & de nostre grandeur. Ha ! ce seroit vne lascheté par trop grande, & vne coyonnerie de Florence, de tourner le dos au danger, & le visage au vent & à l'orage : ferme il faut faire ferme au besoing. Et où il y va de nostre liberté, il faut crier tout

hault, de la vie, ou de la mort, & apres auoir plaidé la cause par les larmes, la plaider par les larmes. Ainsi, mes Princes, mes Braues Princes, chers enfãs d'une mere que vous auez tousiours vniquement cheries, redoublez maintenant vostre zele, & vostre courage, embrassez la cause de vostre mere, de vostre patrie, autorisez la grandeur de vostre ieune Roy : & afin que ce grand Estat ait son plain & son large, & que l'injustice n'attire sur luy & sur vous l'indignation du Ciel, prestez la main à la iustice, à ce grand Parlement, à ce venerable Senat : Vous estes assez puissants & assez forts : Car si Cyrus se croyoit assez fort, pourueu qu'il soustint vne cause iuste : Helas ! puissants, que vous estes puissants, mes Princes, puis que vous soustenez la cause d'un ieune Roy, qu'on va insensiblement accabler, & protegez l'autorité de la Iustice. Il ne faut pas aller d'un pied en vne action qui desire tant de courage : il ne faut pas imiter Sextius ce grand homme d'Estat, si vous ne voulez estre mocquez comme luy, qui s'aigna du nez, & perdit courage à moitié chemin d'une grande entreprise. Tout vous rit, tout vous aime d'amour, le peuple vous ouure & les cœurs & les bras : Ainsi rompons ces traittes, qui ne sont que des pieges pour nous prendre, n'attendons de faire de nuict ce que nous pouuons faire de plein iour. L'occasion mesprisée, mes Princes, nous échappe, comme la Panterbe s'esluanoit, si elle n'est soudainement tirée de terre.